

«Føresegner for husfondet åt Oslo Fylkeslag.

Godkjende av Sosialdepartementet i skriv 8. februar 1927
og vedtekne på årsmøte i Oslo Fylkeslag 13. februar 1927.

1.

Husfondet åt Oslo Fylkeslag er skipa med det fyremål å få reist ein «Heim for landsungdom» i Oslo.

I «Heim for landsungdom» skal ogso vera rom til kontor for sosialt arbeid millom landsungdom i Oslo og høvelege billege møterom for lag som er innmelde i Oslo Fylkeslag.

2.

Styret i Oslo Fylkeslag stend for styringa av fondet. Det vert førd serskild rekneskap for fondet sine pengemidlar og årsmelding og ettersett rekneskap skal kvart år sendast Sosialdepartementet. Pengane skal til kvar tid vera fest i statsobligasjonar eller andre like gode verdepapir.

3.

Når so langt lid at pengane skal nyttast, tek årsmøte i Oslo Fylkeslag avgjerd om det og vel ei nemnd som saman med ein representant frå Sosialdepartementet og styret i Oslo Fylkeslag set planane i verk.

4.

Skulde Oslo Fylkeslag slutta gjeng fondet over til Noregs Ungdomslag som saman med Sosialdepartementet nyttar det til dei fyremål som er nemnd i paragraf 1 (jamf. Paragraf 8) i lov for Oslo Fylkeslag.»

På årsmøtet vart det eit langt og kvast ordskifte om lagsarbeidet. Styret bad årsmøtet oppmoda laga om å gjera kva dei kunne for å halda rusdrykken borte frå møter og festar. Dette vart vedteke mot to røyster.

Elles gjekk det att i dette ordskiftet det same som på tidlegare årsmøte og i åra frametter at det var svært ulike meiningar om dansen.